

Bohgeq Caeuq Lwgsaeq

□ Cungh Yujingh / 钟汝荆

Bohgeq 47 bi cij baenz boh, gig cunghgyaez daeglwg de.

“Vihmaz daxboh gij nyzdoih gou nyaenx oi, daxboh gou nyaenx geq ne?” Daeglwg naengh gwnz ga daxboh, lumhlumh bekbek faj naj mumh yat daxboh, cam naeuz, “Daxboh yaek bienqbaenz goeng geq lo.”

Saw mbouj gvaq raemxmboq, soh mbouj gvaq lwgnyez. Gij coenz lwgnyez gangj dwg coenz caensaed, daxboh mbouj rox han maz ndei.

“Daxboh, mwngz gangj, dwg mbouj dwg ha?” Daeglwg lij cam.

“W.” Bohgeq dap sing ndeu.

Daeglwg cimyawj faj naj daxboh, youh cam: “Faj naj daxboh vihmaz nyaenx uekcuek?”

Nienzgeij geq le, goknaj bi beij bi nyaeuqnyat, baihgwnz hwnj miz raiznyaen, gvaiq mbouj ndaej daeglwg naeuz uekcuek lo. Ndaejnyi daeglwg yienghneix cam, bohgeq ndaw hoz mbouj daih angq, cijndei gag riumbw.

Danghnaeuz daeglwg doeg ndaej baenz saw, daj siujyoz doeg daengz daihhag cibgeij bi, bohgeq itdingh yaek gyaeu daengz 70 bi cij ndaej raen daeglwg daihhag baetnieb, okdaeuj ra hong goj ndaej sung ndaej ndei, couh mbouj au baenzneix yousim lo. Danghnaeuz daeglwg doeg mbouj baenz saw, bohgeq lij au gyaeu lai nanz di cij ndaej, deng hwnq ranz

aeuyah hawj de, couh nanz ndaej soengyungz an’ onj gvaq bigeq lo.

“Gou ceiq gyaez Daegvangz, daihngaih dwg daxmeh, gaenlaeng cij dwg daxboh.”

Daegvangz dwg boux cangh-dajdoq he, dinfwngz gvai, doq daizsaw, doq eij, doq aen loengx coux doenghyiengh lwgnyez, guh ndaej lengj dangqmaz, lox ndaej lwgnyez simmaij raixcaix. Daegvangz ngoenz-lawz daeuj ranz de, ngoenzhaenx couhdwg ngoenz ceiq angq daeglwg lo.

Daxmeh doiq lwg naeuz: “Ranz raeuz dwg boh ceiq gyaez nyeziq ha, mwngz vihmaz mbouj ceiq gyaez daxboh?”

Caih vunz laemhlaex o, daeglwg lij dwg naeuz: “Gou ceiq gyaez Daegvangz.”

Vihmaz daeglwg nyaenx gyaez Daegvangz? Bohgeq miz di hozhaenz, mwh daeglwg caeuq Daegvangz angq guhcaemz, daxboh caegcaeg bae ndomq. Mbouj ndaej mbouj baiqfug! De rox au benjfaex dap singzbauj, youh rox yungh benjfaex caeuq hab hung guh baenz gij doenghyiengh dwggvaez, gij faex gij benj daengz ndaw fwngz de yaep he sikhaek bienqbaenz aen ranz iq caeuq doenghduz.

“Geq lo, mbouj beij Daegvangz ha!” Bohgeq gag nam gag naeuz.

Daeglwg haeuj youwzyenz le, hag rox di soq lo.

Seizneix daeglwg rox aen soq ceiq hung couhdwg 50, mwh de siengj au maz doenghyiengh lailai, couh au aen soq neix daeuj gangj, lumjnaeuz “gou yaek au 50 duz byagim”、“hawj gou 50 aen bauqva”.

Yawjraen ndawranz venj aen siengq daxgoeng, daeglwg cam bohgeq: “Daxgoeng bae gizlawz lo?” Boh lwnh de nyi daxgoeng gaenq dai bae lo. Codaeuz daeglwg laihnaeuz dwg bae gizlawz, hoeng ngoenz gvaq ngoenz, ndwen doek ndwen, de ciemhciemh rox maz dwg dai lo, roxyiuj vunz geq le couh rox dai bae.

Baez he, daeglwg ing youq henz ndang bohgeq naeuz: “Boh, mwngz

daengz 50 bi gaej dai bw, danghnaeuz mwngz dapwngq gou doeklaeng gou couh ceiq gyaez mwngz!”

“W, gou mbouj dai.”

Bohgeq bineix 49 bi, daeglwg rox daxboh bimoq couh ndaej 50 bi lo, couh yousim boh daengz bisoq ceiq hung neix le couh yaek dai bae.

“Caencingq mbouj dai o?”

“Caencingq mbouj dai!”

Daeglwg maqmuengh daxboh couhcinj gvaq le 50 bi, hix gaej dai. Bohgeq hix siengj gyaeu daengz caet bet cib bi, siengj yawjraen daeglwg baetnieb le ra ndaej faenh gunghcoz ndei caeuq au yah seng lwg. De ciemhciemh bienqbaenz goeng geq lo, caen maqmuengh daeglwg sikhaek majhung baenz vunz.

Fwen Lox Lwgnyez Ninz

□ Couh Fuloz / 周付乐

It ndaundeiq,
Ngeih caiq aen,
Aen ndeu dwk dingh doj,
Aen ndeu coq dingh baed,
Aen ndeu daeb gwnz lae,
Aen ndeu beiq gwnz namh,
Aen ndeu lamh gwnz bam,
Aen ndeu byuz gwnz vax,
Aen ndeu saj gwnzmbwn,
Aen ndeu ninz gwnz faex,
Vunz doxcaemh bae ra,
Raen duzmbaj hwet gaeuz,
Raen duzbaeu swiq din,
Raen duz dingz cae reih,
Raen duzbeih ndaej ndwen,
Gag guh fwen reqreq,
Geij duz gvej samcom,
Doxcomz guh fwen langh,
Yienghyiengh cungj rox gangj,
Nyangz gaiq neix gaiq de,
Gag fwen cix gag danq,
Gongzrere baenzhaemh,
Couh gangj vaiz doxdaemj,
Laemx baihneix baihde,
Vaiz geq caeuq vaiz nyz,
Song ga gvez laj riengh,
Yienghyiengh de cungj rox,

Gag boq daengz maxlaeuz,
Maxlaeuz ndang caen mbaeu,
Byaij hwet gaeuz gemgem,
Cienmonz demq lwgsau,
Caemh mbouj lau lwgnyez,
Ngoenzbonz youq baihde,
Gaeng geq ok daih loh,
Lwgsau hix mbouj rox,
Ok gizgox daeuj youz,
Sau ndaej cibbet gouj,
Deuz haeuj buj bae dai,
Saedcaih dwg doeknaiq,
Bienqbaenz roek diuz sai,
Diuz ndeu raiz mbawraeu,
Diuz ndeu gaemh maxlaeuz,
Diuz ndeu yaeuh nuengx iq,
Diuz ndeu ra yahnoix,
Diuz ndeu boiz yahlaux,
Diuz ndeu bauq yahmaeuz,
Deuz bae gwnz saeu youq,
Caet gang laeuj,
Gouj gang dangz,
Riengz maningq,
Cingj bouxhek,
Gek bouxvaih,
Baiq bouxsien,
Youq cien nienz mbouj lau.



Gyoengq bya hungmbwk dah caem lae.

Dozsw

Ngoenzngoenz Ngeix Mwngz

——sij hawj 《Gvangjsih Minzcuz Bau》

□ Vangz Civeij / 黄志伟

Mbouj rox vihmaz? Cungj youq gyanghwnz caemrwgrwg seiz ngeix mwngz.

Byonghhwnz ninz mbouj ndaek, ngeix mwngz cingznaek youq ndawsim. Mwngz lumj gyongq muengx cw youq gwnz gyaеuj gou, hawj gou deuz mbouj ndaej.

Gou dawz ok geij mbaw ceijsaenq, dawz gij roxnyinh gwnz-biengz sij hawj mwngz, hawj mwngz rox seizdoeng gyoetrdwrw, ndaej yawj naehau; seizein raeuj-

rubrub, ndaej nyi roeg ciuz.

Gyangngoenz gou youq bak-dou muengh mwngz, gyanghwnz gou youq laj daeng hawj mwngz sij saenq. Maqmuengh mwngz ndaej hoiz coenz hawj gou hix ndaej, muengh moix fung saenq bienq-baenz naednaed faenhaeux, youq ndawsim mwngz didngad.

Gij aencingz mwngz, gou cungj mbouj lumz, itcig daengz laepda hix mbouj ndaej lumz mwngz.